

Cantante Amanda Alders

“Semper mi kier a canta, pero mi tabata timido”



ORANJESTAD- Cantante Amanda Alders ta conta Bon Dia Aruba cu semper e kier a canta pero e tabata hopi timido. Poco Poco Alders, cu actualmente tin 21 aña di edad a vence e miedo aki.

Ora e la graba su prome cancion “Dushi hala bin” el a cuminsa kere den su mes, Alders ta conta. Si esaki tabata su soño y e kier logra algo e mester bay pe.

Alders ta conta cu un di su influencianan mas grandi tabata les di musica na scol, pero tambe musica en general. “Semper mi tabata skirbi poema y tur ora melodia tabata dreña mi cabes, asina mi a cuminsa pensa cu mi mester canta” Segun Alders el a cuminsa canta cu 15 aña. Tur dia Alders ta pensa cual tema nobo e lo kier tin den su cantica y ki ritmo. E ta purba di hinca e melodia den otro y traha hunto cu su productor nan pa yega na un areglo.

Vision futuro

Bon Dia Aruba a puntra Alders manera ken e lo kier ta den futuro pa cual el a comenta “Bosa pa ta honesto nunca mi a pensa pa ta manera un artista grandi den exterior paso semper mi a pensa pa ta mi mes y traha mi mesun imagen artistico. Semper mi a scucha cantica nan di nos artista nan local.

Pero mi ta admira artistanan den exterior manera Beyonce, Jennifer Lopez” Alders a wordo puntra si e ta haya careranan artistico peligroso. Alders a comenta cu tin ora e ta pensa cu e por ta peligroso, paso artistanan grandi den exterior ta cambia despues di tempo. “Porta placa ta hunga un rol y fan. Paso bo por tin bo bida personal, pero porta bo kier mas cu esey. Tur hende ta diferente. Ami ta haya bo por ta feliz haciendo locual bo stima. Nos ta grandi pa sa kico ta malo y kico ta bon” Alders ta bisa.

Proyecto actual
Alders ta subraya cu e tin hopi proyecto andando. E ta traha



cu diferente artista di Aruba y afo. Alders a yega di bay Hulanda pa graba cu artista na

Hulanda y pa su persona esey tabata un experiencia unico. “Manera tur hende por a rip-

ara mi ta canta ritmo combina (bailabel) pero tambe mi ta traha otro genero tambe. Mi tin un bachata na caminda, mi tin un dubstep hunto cu 3WayzMusic, mi tin varios proyecto” Alders ta enfatisa.

Solista

Bon Dia Aruba a puntra Alders si e ta wak su mes cantando den un banda of e lo kier sigui como solista. Alders ta conta cu e kier keda un solista y simplemente canta cu otro artista de bes en cuando. Alders ta bisa cu e gusta e banda local Buleria.

Te cu awo Alders ta conta cu e la presenta na un concierto di Enmeris y un biaha na Confessions night club. Alders ta bisa cu e tabata hopi nervioso pero cu e la bay bon. Pa finalisa Alders a comenta cu e kier bay Hulanda den futuro, cu musica por influencia sociedad hopi. “Si hende keda scucha cosnan negativo nunca nan lo por haci cosnan positivo. Den musica bo ta haya tur dos cos.” Alders a comenta. □